

Vanuatu blong yu




This book is published by:

Vanuatu Electoral Office and Vanuatu Department of Curriculum Development.

With the support of the Vanuatu Electoral Environment Project (VEEP)

United Nations Development Programme (UNDP) Pacific Office

©UNDP 2020 all rights reserved



Wanem hemi demokrasi?

Toktok ia demokrasi I kamaot long wan Grik toktok "demos" we I minim "pipol" mo "kratos" we I minim "rule". Hemi stap minim se ol pipol oli kat pawa mo otoriti blong jus mo disaed eni man o woman blong ripresentem olketa. Vanuatu hemi wan ripresentatif demokrasi we pipol nao I elektem ol man mo woman blong dibeit mo tokbaot ol lejislesen insaed long palemen.

“

Wan popula presiden blong United States of America, Abraham Lincoln hemi givim wan bes eksplenesen long toktok ia:


"Demokrasi hemi wan gavman blong pipol, we I stanap folem joes blong pipol, blong lukluk long ol nid blong pipol."

Vanuatu hemi wan demokrasi we yumi elektem ol man mo woman blong ripresentem yumi long palemen.

- Long Vanuatu, ol memba blong palemen oli jusum Praem Minista.
- Gavman hemi ranem kaontri folem konstitiusen.
- Konstitiusen hemi Saprim loa o Mama loa blong nesen.

Konstitiusen hemi kavremep evri samting abaoat demokrasi, ol institiuseن kasem fasin blong ranem ol eleksen. Konstitiusen I givim fandamentel raet mo fridom inkludim fridom blong ekspresen, fridom blong kam tugeta, fridom blong mekem asosiesen mo fridom blong patisipet long eleksen.





Constitution



LONG GOD YUMI STANAP

Vanuatu mo Demokrasi

Long 30 Julae 1980, Vanuatu hemi kam wan independen kaontri.

Konstitiusesn blong yumi I talem se: "Nasonal sovereniti hemi blong pipol mo oli eksaesem sovereniti ia tru long ol man mo woman we oli ripresentem olketa long palemen."



Long Vanuatu, I kat tri ofisol stamba pawa.



Lejisleja

Fesfala stamba pawa hemi **LEJISLEJA**. Ol memba blong palemen nao oli kat pawa ia blong mekem ol loa blong kaontri from ol sitisen oli elektem olketa blong mekem wok ia.



Judiseri

Namba tu stamba pawa hemi **JUDISERI**. Ol kot, ol loyia, ol majistret mo ol jaj nao oli stap intepretem ol loa blong kaontri.



Eksekutif

Namba tri stamba pawa hemi **EKSEKUTIF**. Hemia hemi stamba pawa we I stap aplaem ol loa mo ol polisi blong gavman. Praem Minista wetem kaonsel blong ol ministra nao oli pat blong Eksekutif bodi ia we I fomem gavman.

Trifala stamba pawa ia oli independen bitwin olketa. I nokat wan I kat mo pawa bitim ol narwan mo I nokat wan I kat raet blong talem long narawan blong folem tingting blong hem.



Sivil Sosaeti mo Media

Sivil Sosaeti

Antap long trifala ofisol stamba pawa ia, I kat tu Sivil Sosaeti we wok blong hem I impoten tumas. Sivil sosaeti I karem tugeta ol simpol man mo woman we oli wok olsem wan grup. I kat ol okanaesen we I no kat konekisen wetem gavman, ol asosiesen olsem ol jioj, ol krup blong ol woman, yut mo pipol wetem spesel nid mo olketa long praevet sekta (bisnis).

Ol sitisen oli save talemaot tingting blong olketa mo kam memba blong ol sivil sosaeti. Oli save wok wanples blong tokbaot ol kutfala valiu blong ol man mo woman, proteksen blong neija, envaremen mo respek blong Hiuman Raet.

**Sivil Sosaeti mo Media oli save help blong mekem sua se
I kat transparensi mo akaontabilti insaed long gavman.**

Media

MEDIA (tivi, redio, nius pepa, mo sosol media olsem fesbuk) tu I kat wan impoten wok insaed long wan demokratik sosaeti from se media I save askem kwestin mo infomem pipol abaat ol samting we gavman I stap mekem.

Taem yu stap ritim wan samting long sosol media, yu mas jekem mo mekem sua se ol infomesen ia I stret mo I kamaot long wan ples o sos we pipol I kat trast long hem.





Sivil Sosaeti mo Media

Nokat wan
samting I
save haed

Transparensi

TRANSPARENSI i minim everi samting I klia mo hemi isi blong ol man mo woman I save jekem mo harem save.

Akaontabiliti

Akaontabiliti i minim se yu mas kat wan responsibol atitiud mo yu mas save jastifaem ol aksen mo desisen blong yu.

Sivil sosaeti i stap waj mo jejem sapos gavman i stap mekem kut samting blong ol sitisen blong hem.




Olsem:

- kutfala skul
- transpot
- helt
- wok
- ekonomik opotiuuniti

Demokrasi

**Sapos gavman mo ol sitisen
oli akoantebol long wanem
oli stap mekem, I minim
se kaontri ia I stap mekem
stret fasin blong demokrasi**





Wanem hemi Palemen?

I kat 52 memba insaed long Nasonal Palemen blong Vanuatu. Oli kolem olketa ol memba blong Palemen (MP).

Oli kam memba blong Palemen taem oli winim wan eleksen from pipol oli vot long olketa.

Wanwan long olketa I ripresentem 18 konstitiuensi long Vanuatu. Wan konstitiuensi hemi wan eria long kaontri we wan o plante memba blong Palemen I stap lukaotem. I kat sikis konstitiuensi we oli kat nomo wan memba blong Palemen (konstitiuensi wetem singel memba) mo ol narawan oli kat bitwin tu mo seven memba blong Palemen (konstitiuensi wetem plante memba)

Oi MP oli stap kam tugeta long Palemen Haos long Port-Vila blong tokbaot ol niu loa, ol developmen plan blong kaontri, mo tekem desisen long rod we Vanuatu I mas folem.

Majoriti blong ol MP oli fomem gavman mo sam oli save jusum olketa blong kam ol minista.

Palemen I laef blong fo yia. Afta long fo yia ia, Palemen I nomo eksist kasem niu eleksen I tekem ples.

Eleksen blong wan niu Nasonal Palemen I mas hapan insaed long 60 dei afta we Palemen I nomo eksist.

Insaed long 60 dei ia, gavman we I stap oli kolem “keateka gavman”

Keateka gavman I lukaotem kaontri kasem we wan niu gavman I fom afta we wan jenerol eleksen I hapan.



Wanem wok blong wan Memba blong Palemen?

Oi Memba blong Palemen oli stap mekem ol niu loa blong kaontri. Palemen I kat pawa blong mekem loa blong putum pis, oda mo ol loa blong gavanem gud Vanuatu.

Palemen I elektem Praem Minista aot long ol 52 MP. Every MP wetem ol presiden blong ol provins oli ol memba blong wanem yumi kolem "elektorol kolej" we hem nao I stap elektem Presiden blong Vanuatu. Presiden blong Vanuatu I stap blong faev yia.

Wan memba blong Palemen I stap ripresentem ol man mo woman long konstitiuensi blong hem. MP ia hemi mas save gud ol nid mo ol praeoriti blong pipol blong hem.


MP I mas storian wetem pipol blong hem evritaem long konstitiuensi blong hem blong save wanem nao ol impotem divelopmen we oli nidim olsem klinic, rod, skul, wota saplae, wok mo ol aktiviti blong winim mani.

Pipol I kat raet blong askem long MP blong olketa abaot wanem nao hemi divelopmen plan blong konstitiuensi blong olketa mo hao nao bae hemia I save impruvum laef blong olketa.

Sapos wan MP I no mekem wanem pipol blong hem I askem hem blong I mekem o I no mekem promes blong hem, pipol I save jenism hem wetem wan nara man o woman long nekis eleksen.

Oi MP oli sud wok blong provaedem besik sevis long evriwan. Oli mas tritim semak ol difren vilij mo komyuniti.





Lokol Gavman

Antap long everi samting ia, I kat tu Lokol Gavman strakja, Provin sol mo Munisipol kaonsel. Olketa oli lukaotem ol lokol gavman eria mo oli stap promotem helt mo kutfala laef blong ol man mo woman we oli stap long eria ia. Oli kat pawa blong pasem sam smol loa long level blong olketa.

Privinsol Kaonsel

I kat sikis Provins long Vanuatu mo wanwan long olketa I kat Kaonsel blong hem.

**Malampa
Shefa**

**Penama
Tafea**

**Sanma
Torba**



Pipol nao oli elektem Provin sol Gavman Kaonsel we bae I laef blong fo yia. I kat tu ol memba we Minista blong Intenel Afea I putum olketa blong oli ripresentem ol jif, ol jioj, ol woman mo ol yut. Ol kaonsela nao oli elektem hed blong kaonsel olsem jemen blong bodi ia.

Munisipaliti

I kat tri munisipaliti:

Lenakel (Tanna)

Luganville (Espiritu Santo)

Port Vila (Efate)

Ol man mo woman long Lunganville mo Port-Vila oli jusum ol kaonsela blong olketa long wan eleksen we I hapen everi fo yia. Long Lenakel, Minista blong Intenel Afea nao I putum ol kaonsela. Lod Mea hemi hed blong wan Munisipol Kaonsel mo ol kaonsela nao oli elektem hem. Long Luganville mo Port-Vila I kat risef sit blong ol woman blong mekem sua se ol woman tu oli kat voes insaed long Munisipol Kaonsel.



Wanem hemi eleksen?

Eleksen hemi taem we ol pipol oli jusum ol man mo woman blong ripresentem olketa.
Hemi wanem we yumi kolem VOT.

Representation of the People Act (RPA) hemi men elektorol loa blong kaontri mo I kat tu sam narawan.


Long Vanuatu I kat difren kaen eleksen

- **Nasional Jenerol Eleksen** taem yumi jusum ol Memba blong Palemen.
- **Provinsol Eleksen** taem yumi jusum ol Memba blong Provinsol Kaonsel.
- **Munisipol Eleksen** hemi taem ol man mo woman long Port-Vila mo Luganville oli jusum ol Memba blong Munisipol Kaonsel.
- **Nasional Referandum** hemi taem yumi vot blong talem Yes o talem No long wan jenj insaed long Konstitiusen we Palemen I bin pasem.

Eleksen I stap hapan everi fo yia. Long dei blong eleksen, ol man mo woman we oli kat 18 yia I ko antap oli vot blong jusum ol man mo woman we oli wantem. Vanuatu Elektorol Komisen mo Vanuatu Elektorol Ofis nao tufala I supavaesem mo okanaesem ol eleksen.

Long Vanuatu, yumi kat tu Malvatumauri we hemi stap olsem Nasional Kaonsel blong ol Jif. I kat 22 Jif we oli memba blong kaonsel ia. Wok blong olketa hemi blong givim advaes long gavman abaot tradisen mo Melanesien valiu.





Wanem hemi vot?

Vot hemi minim jusum wan man o woman blong I kam lida o voes blong yu.

Everi man mo woman Vanuatu we oli kat 18 yia I ko antap oli save vot. Hemia hemi raet mo responsabiliti blong olketa.

Bifo we yu save vot long wan eleksen, yu mas rejista fastaem long Elektorol List. Hemia hemi list blong everi man mo woman we oli rejista blong vot. Yu no mas foket blong holem wetm yu Nasonal ID kad blong yu.

Everi man mo woman we oli rejista blong vot bae oli vot long wan poling stesen we I stap kolosap long eria blong olketa. Poling stesen hemi ples we ol man mo woman oli ko long hem blong vot mo jusum olketa we bae oli tekem voes blong olketa I ko insaed long Nasonal Palemen, Provinsol Kaonsel mo Munisipol Kaonsel.

Lanem ol rul blong vot

**Yu save vot long eleksen dei nomo long poling stesen
we yu regista long em mo yu save vot wan taem nomo.**



1. Go long
Polling Stesen




2. Givim nasonal ID
kad blong yu




3. Karem
Balot pepa



4. Findem foto blong
kandidet mo putum
insaed long envelop



5. Putum vot blong
yu long balot bokis



6. Makem finga long
ink mo karem bak
nasonal kad blong yu



Vot blong yu

Taem wan man o woman I kasem 18 yia, hemi mas rejista long elektorol buk blong save vot long nekis eleksen.

Yu save rejista truaot long yia long Vanuatu Elektorol ofis long Port-Vila. Yu save rejista tu long provins blong yu be yu mas save wetaem nao hemi stret blong rejista. Rejistresen hemi klos sikis wik bifo eleksen. Taem we yu kasem 18 yia, yu mas mekem sua blong holem wetem yu Nasonal ID kad blong yu, from hemia nao bae I mekem se yu save vot long eleksen. ID kad hemi impoten tumas long eleksen mo ol narafala samting tu.

Vot hemi sikret. Long ples blong vot, yu ko long wan smol rum mo mekem joes blong yu mo bae I nokat wan man o woman I save luk se yu stap vot long wanem kandidet. I no nid blong yu tokbaot long ol man se yu yu vot long wanem kandidet.

Vot blong yu hemi voes blong yu.

Hemi impoten blong vot from vot hemi voes blong yu. Hemi taem blong yu jusum kutfala man o woman blong hemi wok blong yu mo komyuniti blong yu insaed long palemen.





Olketa men ofens blong eleksen hemi:

Yu vot mo long wan taem

Yu vot long ples we i no ples blong vot blong yu

Yu kiaman se yu difren man afta yu vot long ples blong hem

Braeberi: Taem yu akseptem mani blong wan kandidet afta yu yu vot long hem

Triting: taem yu akseptem ol kif o presin, tring, o narafala samting blong vot long wan kandidet

Yu mekem kiaman stetmen

Yu stopem wan elektrol ofisa blong mekem wok blong hem

Yu distroem ol balot bokis o elektrol pepa

Taem yu mekem se vot i nomo wan sikret

Taem yu kivim ol rong infomesen long ol elektrol otoriti

Taem yu intafia wetem balot bokis mo eni narafala elektrol samting

Olketa ofens blong eleksen

I kat ol loa, rule mo regulesen we i soem fasin blong ranem wan eleksen. Hemia hemi impoten from yumi wantem wan eleksen we hemi fri, fea, transperen, pisful mo yumi save trastem. Hemie responsabiliti blong evriwan blong folem loa mo no mekem eniting we I no stret.

Mekem wan samting I rong long taem blong eleksen oli kolem elektorol ofens mo man o woman we I mekem I save faen o ko long kalabus.

Ol men elektorol ofens oli stap long narafala peij. I kat sam narafala ofens we I aplae long ol kandidet mo ol rule we oli talem wanem wan kandidet I save mekem o I no save mekem. Long taem blong kampen, ol kandidet oli save mekem ol rali, ol posta mo ol flaea wetem ol toktok we I save mekem ol vota I vot long olketa. Sapos wan kandidet I givim mani o stap mekem ol vota I fraet blong oli mas vot long olketa, hemia hemi wan ofens.



Ol komplen

Hemi raet blong evri sitisen blong ripotem eni ofens blong eleksen. Hemie save lonjem wan keis tru long nomol kot hemia bifo 21 dei afta long alekesen blong ofens we i bin tekples.

Ol Petisen

Hemi raet blong evri kandidet o sitisen blong lonjem wan elektorol petisen blong jalenjem risal blong wan eleksen. Ol elektrol petisen ia oli mas prisentem bifo 21 dei long pablikesen insaet long ofisol Gaset blong ol risal blong eleksen. Saprim kot hemi daerekli handelem ol petisen.



Wanem nao hemi wan Kandidet? Wan prokram mo wan kampen blong eleksen?

Ol kandidet

Wan kandidet hemi wan man o wan woman we i wantem ripresentem ol pipol insaed long konstitiuensi mo hemi trastem se hemi save mekem ol kutfala samting blong olketa.

Eni man o woman Vanuatu we i kat 25 yia long taem blong nominesen period mo hemi rejista blong vot hemi save stanap olsem wan kandidet. Nominesen period hemi wan taem we oli putum blong ol man o woman we oli wantem kam kandidet oli save aplae long hem.

Ol prokram

Wan kandidet bae i talemaot long olketa vota blong hem wanem nao hemi ol visen blong plan we hem i kat blong divelopmen blong komyuniti blong hem. Kandidet bambae hem i talemaot long olketa vota blong hem wanem nao bambae hem i mekem blong helpem komyuniti mo wanem visen blong kaontri. Hemia nao yumi kolem wan prokram.

Eni Ni-Vanuatu sitisen we hemi wan vota we i rijista finis I save kam wan kandidet sapos hemi kasem 25 yia finis mo long taem blong nominesen.





Wanem nao hemi wan Kandidet? Wan prokram mo wan kampen blong elekSEN?

Kampen blong elekSEN

Taem we Elektrol Komisen hemi putum deit blong elekSEN, kampen blong elekSEN hemi stat 14 dei bifo elekSEN dei (Edei). Long taem blong kampen blong elekSEN olketa kandidet oli okanaesem ol rali mo toktok. Oli advetaes long niuspepa, redio, tivi mo eksplenem from wanem nao ol man i mas vot long olketa. Ol kivimaot ol materiol blong kampen olsem ol posta, ol flaea mo ol tisot.

Kampen i stop 24 haoa bifo dei blong elekSEN. Long dei blong elekSEN afta we evriwan i vot finis, oli kaontem ol balot pepa mo kandidet we i kasem hae namba blong pepa (vot) nao bae i kam memba blong palemen (MP) blong nekis fo yia.

Oli pipol oli mas askem ol kwestin long olketa kandidet blong mekem sua se man we oli votem hem, bambae hemi wan man we bambae hemi save wok from bes intres blong konstitiuensi mo kaontri, be ino blong mitim nid blong sam man nomo.

Hemi rong blong akseptem ol feva o mani from vot blong yu. Sapos wan kandidet i tritenem o mekem vota i fraet, hemia tu hemi rong. Hemia yumi kolem ol ofens blong elekSEN mo oli save panisim candidet long wan faen o hemi iven save ko long kalabus.





Konstitiusesen i talem:

"Evriwan i kat raet long olketa fundamental raet mo ol fridom blong wanwan man witaot diskriminesen long saet blong reis, ples man i kam long hem, relijes o tradisnol bilif blong hem, ol tingting blong politik blong hem, lanwis o sex blong hem, be sabjek lo rispek long ol raet mo fridom blong narafala man ol lijitimet interes blong pablik long saet blong interes long difens sefti, pablik oda, welfea mo helt."

Evri sitisen i ikwal

Evri sitisen blong Vanuatu oli ikwal nomata oli woman o man, olfala o yangfala, helti o disebol, long taon o aelan, long wan traeb o narafala, i kat edukesen o no.

Sapos yu save long wan we i kat wan disabiliti helpem hem blong ko rejista blong vot mo helpem hem blong ko long poling stesen long dei blong eleksen. Sapos wan i no save muv o i sik, wan vota we i rejista i save vot long ples blong hem. Hemia yumi kolem proxy. Yu mas aplae from wan proxy vot bifo eleksen, so yu mas redi.


Evriwan i kat raet blong save.

Sapos yu save long eniwan long famle mo komyuniti we oli no save rid, yu ritim buk ia long olketa blong helpem olketa i kasem save long saet ia.

Olketa yut

Ol yut blong yumi olketa oli kat ol kutfala aedia abaot olsem wanem blong impruvum ol ting blong fiuja blong kaontri. Yumi nidim voes blong ol yangfala long Palemen, ol Kaonsel blong provins, long ol munisipaliti tu. Ol yangfala oli mas mekem sua se oli vot long taem blong eleksen blong mekem voes blong olketa i kamaot long politik.





Evri sitisen i ikwal

Olketa woman

Long Vanuatu yumi kat sam woman nomo long palemen o gavman. Haf long populesen blong Vanuatu hemi ol woman. Vanuatu i kat plante woman we oli hadwok, profesenol mo oli kat plante talen. Iven we i had mo long wanwan woman, yumi kat plante woman we oli kwalifae we oli save mekem kutfala wok blong ripresentem komyuniti mo faet blong impruvum ol kondisen blong laef long komyuniti blong olketa.

Politik i blong evriwan, i no blong ol man nomo.

Ol woman speseli oli mas vot from olketa tu oli save ol nid blong komyuniti. Ol woman oli save wanem we ol pikinini blong Vanuatu oli nidim blong fiuja. Ol woman oli kea abaot fiuja blong ol pikinini. Ol woman oli kat plante blong kontribiut long hem long dvelopmen blong kaontri blong yumi.



Raon long wol ol woman oli stap kam mo konfiden mo ol man i jes stap luksave we olketa woman oli save kam ol kutfala lida tu. Yumi kat plante bigfala woman we yumi nidim voes blong olketa long palemen, long ol provinsol kaonsel mo ol munisipaliti.

Mi vot from se



Lehina John, 36 blong Okapa, Santo

"Mi vot from mi wantem se ol man we mi vot long olketa oli tekem voes blong mi mo komyuniti blong mi wetem voes blong ol difren okanaesesen olsem yut, woman mo olketa jioj i ko long provinsol gavman mo long palemen blong oli save helpem yumi."



Mi vot from se



**Joseph Lakoiala, 54, blong Pentacost,
silip long Freshwota, I no wok**

"Hemi impoten tumas blong yu vot. Gavman bae i mekem some divelopmen long fiuja from we yu bin votem wan ripresentatif long Palemen. From we yu vot bae some divelopmen long fiuja. Sapos yu no vot yu no kat wan ripresentatif long Palemen mo yu no eksesaesem konstitiusonol raet blong yu blong elektem wan man we yu trastem blong ko long Palemen.

Hemi impoten blong vot blong yu save jusum raet man we i save mekem sam niufala loa blong helpem kaontri blong yumi tede mo long fiuja. Fulap taem yumi komplen be olketa we oli stap komplen oli no stap vot be oli kut blong komplen nomo."

Vot blong yu

Mi vot from se



**Ross Terry, 36, Haoskel
Matanvath / North West Malakula**

"Mi wantem se gavman i taonem skul fi from se laef blong tede hemi no isi mo fulap papa mo mama oli no wok fultaem mo ol narafala oli no wok. Hemi important blong everi wan oli vot olsem ol man Vanuatu, yumi kat raet blong vot."



Mi vot from se



Douglas Tamara, 43, blong Nguana/Shefa silip long Switi wok long Transparency Vanuatu

"Long Vanuatu, yumi kat privilej blong jusum ol lida blong ripresetem yumi long Palemen mo mekem desisen we bae i sapotem laef blong ol pipol long kaontri blong yumi long Vanuatu. From wanem nao emi impoten blong patisipeit. Sapos yu no patisipeit o yu no vot bae yu no kat janis blong resem voes blong yu. Bae oli no save harem voes blong yu. Bae i no kat wan memba blong Palemen o ripresentatit i save resem konsen blong yu. Plante man oli komplen from ol seves. Sapos yu wan long ol man we i neva vot be oltaem yu komplen from ol seves i no stret, bae yu no save kat ol kutfala seves from we yu no bin jusum wan ripresentatif blong toktok long voes blong yu.

Eksampol, taem yu wantem mekem wan divvelopmen mo yu kat wan visen, man we yu jusum nao bae hemi i save fasilitateitem ol divvelopmen mo visen we yu kat long komyuniti.

Mi wantem se bae yumi wok tugeta mo kontiniu blong givim aot infomesen mo awenes long ol pipol blong oli save luk se patisipesen blong olketa long eleksen hemi impoten mo espeseli long ol yut we oli no vot yet."

Vot blong yu

Mi vot from se



Jessica Tasale, 30, blong Nguna / Efate

"Mi wantem luk se ol lida we yumi elektem olketa oli givim opotiuuniti long ol man Vanuatu blong oli mekem bisnis from naoia plante long ol man we oli ownem ol bisnis emi ol forena mo ol jaenis.

Emi impoten blong vot from tru long vot blong yu, yu save jusum lida blong yu blong save sapotem ol desisen mo resem ol dvelopmen we yu wantem long komyuniti blong yu long Palemen olsem blong kat ol rod mo ol kindakaten."



Mi vot from se



Waven Arnhambat, 26, Kraduet Studen blong USP FIJI, blong North West Malekula

"Emi impoten blong evriwan i vot from long we ia nao bae yumi save talem ol konsen blong yumi long nasonal level tru long olketa we yumi elektem olketa we oli stap long Palemen. Sapos yu no vot, yu no save talem konsen blong yu from we yu no bin kontribiut long taem blong eleksen. Man we i stap long Palemen emi ripresentem voes blong yu long nasonal level. Taem we yu vot emi minim se yu kat pawa blong talem konsen o tingting blong yu long nasonal level blong oli konsiderem. Wan jenj we mi watem luk se gavman i kriitem plante wok blong ol man Vanuatu."

Vot blong yu

Mi vot from se



Merelyn Tusai, 23, Studen nes long Vila Central Hospital, blong Malekula

"Mi wantem luk se taem bae oli stap long Palemen mo gavman, ol Minista we yumi elektem olketa bae oli adresem konsen blong ol vota blong olketa. Eksapol, mi wantem se Minista blong Helt bae i difendem ol raet blong ol wokman we oli wok long sekta blong helt.

Emi impoten blong vot from emi gud se wanwan long yumi i praktisim raet blong hem blong vot. Tru long vot blong yumi bae oli save harem voes blong yumi long Palemen mo oli elektem Praem Minista."

Vot blong yu Fiuja blong yu Vanuatu blong yu

